

1514

2

6^e Car. 17. 12

Hausen

2104

A D V I S;
R E M O N T R A N C E S
E T
R E Q V E S T E S A V X E S T A T S
G E N E R A V X T E N V S
à Paris, 1614.

P A R S I X P A I S A N S.

M. DC. XIV.

ADVIS, REMONSTRANCES

et Requête aux Estats generaux

tenus à Paris, 1614.

PAR SIX PAYSANS.

Le Bourguignon.

ET à vous, Messieurs, & à vous. Vous estes empeschez, non pas, comme vne poule qui n'a qu'un poulet: mais si vous n'en estes, à tout le moins vous le faictes: Je dis les empeschez, aucuns & non tous, Vous nous voyez icy bien équipez, qui auons pris la hardiesse de venir au lieu sacré: Auons disputé longuement pour les rangs, en fin la Bourgogne l'a emporté. Premier ou dernier, n'importe, pourueu que les affaires aillent bien. La dernière lettre de l'Alphabet est aussi necessaire que la première [dit nostre Curé.]

Vous contemplez le Picard, habillé de mesme que moy, tous deux auons la teste chaude, bons pay-
sans, bons laboureurs qui le trouuons bon, si faictes bien vous, Messieurs des Estats, tant Clercs que Laiz. Voyez le Champenois & Briois, avec la faucille vestu de peaux de veau. Le Poiteuin avec sa grande sequenie & ses sabots, vestu de peaux de che-
ureau. Le Breton fort & dispos, testu & opiniastre, vestu de peaux de vache. Le Tourangeau avec gros chapelets, vne branche de meurier à son chapeau, & dans sa main vne serpe à émonder les antes. Nous voicy qui venons demander Iustice au Roy. Nous

sommes compris sous le Tiers Estat, & esperons que ceux qui en ont la charge s'en acquiteront. Vous nous voyez simplement couuerts de ce que la Nature nous donne, sans beaucoup d'art, non sans peine. Nous ne sommes pas si estranges en nos habillemens que le payfan du Danube, au temps de Marc Aurelle Empereur: mais nous auons à vous dire plusieurs choses & autres. Ceux qui ont pris la charge de parler pour nous (s'il leur plaist) excuseront nostre iuste douleur. Nous voicy pour dire nos griefs avec toute humilité & reuerence à nostre Roy, Image de Dieu, son Lieutenant en Terre, ouy son Lieutenant, & bien d'une autre façon que Decretales modernes ne chantent, & quelques faux Docteurs enseignent. Vous cognoissez bien ces Prouinces, qui en tout ou en pattie ont esté gaulees, c'est à dire, broutees, desolees. Nous demandons iustice, qu'on nous rende nos vaches, nos veaux, nos cheureaux: mais nostre bon froment & nos vins engoulez par les Suisses & autres oyseaux de rapine.

Les Testes sont venuës les premieres à ceste assemblée, elles s'en veulent bien faire accroire, comme de raison. Nous sommes les jambes & les pieds Qui aura coupé les pieds & les iambes à ces belles Testes, les vnes mitrees, les autres empennachees à la lansquennete, les autres à quatre goutieres, il y en a qui se trouueroient bien estonnez. Coupez aux genoulx vous auriez tous fort mauuaise grace, mais qu'il ne vous en desplaise, Messieurs, feussiez vous avec belles quilles d'yuoir ou d'ebene bien dorees & pindarisees. Qui auroit osté les fondemens du Louure ceste belle Architecture ne seruiroit pas de beaucoup, ie m'en raporte à vostre iugement. Nous sommes les iambes & les pieds qui portons ce grand

corps, de plus le ventre qu'il le nourrissons, Bazes, & Piedestaux qui le soustenons. Tout cela abiet, incongneu, sans aparence. Quand on en parle c'est avec tant de mespris: Ce manant, ce vilain, ceste lie. cela est vray, sans esclat, sans ornement. Disons plus la Cloaque, la Sentine de vos passions, de vos furies, de vos rebellions. Nous portons, entretenons, & engraissons tout au contraire de la rate qui s'enfle & desseche le corps, nous sommes dessechez & mangez &, ô malheur! le ioüet du Monde & la Bahieuer.

Nous engraissons ces mittres & prenons patience parce que c'est à bonne intention afin qu'on prie pour nous, qu'on nous instruisse, qu'on nous corrige & le monde sçait comment la plus part s'en acquittent & comment on nous endoctrine: Mais combien il en est parmy eux qui n'estudient mie de peur des Auripeaux. J'ay quelque opinion qu'ils s'en trouuera plus de mulets qui sentent l'Asne que de cheuaux d'Espagne. Aussi ne sont-ils pas hommes de guerre, comme iadis aux deux premieres races de nos Roys, horsmis l'Euesque de Poictiers & quelques autres que ie pourrois nommer de doctrine, de qualité, & de probité qui degaineroient s'il en estoit besoing.

Nous engraissons ces Espees, parce quelles nous conseruent contre les estrangers qui nous auroient tous mis à sac sans elles. Pour cest item nous y contribuons de bon cœur, toutesfois nous desirerions qu'on y allast avec plus de modestie, & de consideration. Nous engraissons les Marchands, Artisans, & autres du Tiers Estat qui seruent à la Republique Patience: Mais quant à ces bonnets quarrez qui gripent du Clergé, de la Noblesse, & du peuple, nous nous regrettons & lamentons qu'ils mangent nos viures, & qu'ils nous facent ieusner pour s'egorger

de perdreaux & de gelinotes de bois. La cause, Messieurs, c'est qu'ils ne seruent de rien à la Republique. C'est vn quatriesme corps engendré de corruption qui vit de corruption suivant la maxime des Naturalistes, que le corps est nourry de la mesme chose dont il est engendré. Quatriesme corps qui ruine les autres trois qui sont si sots, pardonnez à nostre zele Messieurs, qu'ils se laissent manger comme des veaux. Pensez si cet Andriague n'en est bien aise. Et pourquoy le souffrez vous? N'entendons en façon quelcōque parler de ces graues Senateurs des Cours de Parlemens, & principalement de celle qui est la gloire des Senats du monde; car nous sçauons qu'il y a beaucoup de gens de bien qui sont Collomnes de l'Estat, mais de tant de Procureurs, Aduocats, & autres sãguës qui nous succēt iusques aux mouëlles. Bien nous plaignons nous de quoy ils les tolerēt, & pour cest item il n'y a moyen de nous en taire.

Voila dōc ces trois corps & ce quatriesme de corruption nourris par nous. Ils se batent aux presseances, ils sont tous bouffis d'orgueil & de vanité. Nous les nourrissonstous & on ne fait conte de nous, certes, non plus que des excremens. Iniustice estrange & incroyable, & quasi vn reproche à la Nature de nous auoir faict les peres nourriciers de ceste Monarchie, & qu'on nous traite si mal. Que nous soyons les piez, les iambes, le ventre, nous sommes encores ioints avec la teste, avec le cœur par des nerfs, par des arteres, & auons appris de ces deux parties qu'il y a vn ordre au monde estably de Dieu, vne distinction des personnes & des Estats, mais qu'il y a aussi vne liaison. Nous ne voulons pas estre le cerueau, le cœur, les bras, les mains, la poitrine: Confessons que nous sommes les iambes & les pieds ad-

voûez aussi que nous sommes le foye. Au moins si nous portons les fardeaux qu'on ne nous tronque pas, que nous ne soyons point mutilez barbarement, & si on nous seigne qu'on ne nous tire pas tout le sang.

Il ya long temps que nous auons occasion de nous plaindre de ce quatriesme corps, & maintenât nous nous plaignons particulièrement de ces espèces. Demandons iustice au Roy pour le passé & ordre pour l'aduenir. En plaine paix (pour le reste du Royaume) batus emprisonnez, tuez; nos femmes & filles forcées en toutes ces Prouinces, tant d'inhumanitez commises; & personne n'a pris nostre cause en main. Nous sommes aux pieds du Roy nostre souverain Seigneur qui a puissance sur nous, sur nos vies, sur nos femmes & enfans, disons puissance souveraine: mais il est nostre pere & ceste puissance il l'a tient de Dieu. Comme pere nous en esperons secours, œuvre de clemence & bonté: comme la tenant d'en haut nous en deuons attendre iustice, de peur que Dieu ne la prenne de luy.

Ne pouuons comprendre comment le Roy s'est laissé brauer à ses subiets, prendre ses villes & se cantonner aux faux bourgs de sa ville Capitale. Il y a tant de Compagnies de cheuaux legers, de Gendarmes, de Reg: entretenus & le Roy n'a-il pas moyen de se faire obeir. Nous payons tous. Piez plats (dira quelqu'un) cela est trop cognu & vous ne dites rien de nouveau. Pié pointu, respondōs teste folle, Messieurs pardonnez à nostre iuste douleur, c'est ce qui nous cabre & nous met au desespoir. On cognoit l'iniustice, la Tyrannie, l'opression insupportable & [ô Dieu du Ciel!] on est sourd à nos plaintes pendant que nous sommes aux derniers traits de la mort.

8

Au Roy dont en sa Majorité, à la Reyne sa Mere la gloire des Reynes, le soutien de la France, & à Messieurs du Conseil nous demandons reparation de nos maux soufferts & soulagement de nos miseres pour l'aduenir.

Cen'est pas pour nous seuls, c'est pour tous. Quand le terre ne sera point labouree: ny les vignes faictes & les autres ouurages rustiques que deuiendra le Roy mesme avec tout le reste? C'est donc pour le bien Commun que nous parlons, prest à donner franchement de nostre sang, de nostre gresse, de la sueur de nos corps: Mais que les vaines nous soient toutes vuidees, que la substance soit toute deuoree, que nos traux soient conuertis en larmes de sang, nous crions à Dieu & au Roy pour auoir vne meilleure condition, ou la fin de nostre vie. Nous sommes dit-on, comme les Asnes qui portent tout. Souuenez-vous Messieurs des Estats à ce propos, que suyuant le Prouerbe Espagnol *El asno sufre la Carga y no la sobrecarga*, l'Asne souffre la charge, mais non la surcharge, & sans le respect de la cōpagnie, nous pourrions dire à plusieurs qu'ils deuroient auoir compassion de leurs freres.

Nous auons beaucoup de choses à remontrer, aduis à donner, & secrets à decouvrir. Nous commencerons par vne lettre intercepte, qui nous est venue en main passant chemin. Vous aurez patience d'en ouïr la lecture, s'il vous plaist. Aussi vous n'avez pas grande occupations les iours des festes.

Goinfre l'aduenturier à Friquenelle, Salut.

Friquenelle mon amy, ie le disois bien tousiours & se on mocquoit de moy, que le Prouerbe Italien
est

est trop veritable à mon grandissime regret, *I popoli
s'amarzano, gli Principi abbracciano.* Les voila tous à
la Cour cōme aux dernieres idées de Ianuier caressez
bien venus, teste haute, bon minois que vous diriez
qu'ils ont sauué l'Estat. Assis aux Estats ou ailleurs
à grands pennaches les vns, autres petits, tenans leur
rang horsmis ceux qui voyent iouer à la galerie, de
peur de choquer l'antiquité de leur Escusson at-
tendant les ratepennades à la tenuë des Estats aux
Calendes Grecques pour estre fait comme de rai-
son. Les voila donc gaillards & nous bien penaux
bien fots d'auoir vendu le préioly, le moulin, le fief
sur ces Esperances. Nous dirons, nous faisons. Par
ma fressure nous sommes en belle assiete. Ils faisoient
tant les eschauffez. Gueridon nous en auoit aduer-
tis des le commencement. Le bien public, le seruice
du Roy. Tout auant. Et puis tout s'est fondu en
leur interest particulier. Et nous autres fois de hau-
te gamme de les auoir creus ces Caioleurs, en ioleurs
(marchand qui pert ne peut rire) ie suis fort offensé,
ô mon fief! Je serois d'aduis qu'à plusieurs on don-
nast de chapeaux de Cardinaux pour faire despiraux
Romains & aux Castillans, aussi nous en auons trop
peu en France. Ceste disgrace & bricole des fausses
esperances nous doit apprendre à nos despens que la
plus grande finesse est de seruir le Roy: Dieu le com-
mande. Il a plus de moyen de nous aduançer en vne
heure que ces gens là en toute leur vie, Tousiours à
l'Escu de France pour estre bien, & qui a le Roy, faict
tousiours vn leué. I'ay vendu mon fief pour ces bel-
les promesses, & ma femme me bat comme plastre:
maudite ambition des grâds qui cause tant de maux.
A Dieu Friquenelle mon amy, ie croy que tu as aussi
mauuaise mine que moy quant tu te souuuiens de la

guerre de Soissons. L'enrage, ie forcene, o mon fief
Escrit de ma maison a malgaruy à la fin d'Octobre,
& au commencement de ma Diete, & de mon Car-
esme, o mon fief,

Voila Messieurs des Estats la lettre du Compagnon. Il n'y a Sorbone, ny College de trois Euesques qui puisse faire vne leçon plus haute à ces Rolands & Mandricars coureurs & picoreurs de Vaches, que ceste naïfue missiue toute mal coiffée qu'elle est. C'est vn fleau de Dieu que la guerre, mais la Ciuile est espouuentable. C'est là où nous vouloient porter ces zelez Eleazars du repos public, ces Brutus & Cassius & nous les voyons qui font encore les résolus. Nous sommes subiects & devons tout supporter patiemment par les loix diuines & humaines: Mais souuenez-vous que les peuples n'ont iamais faute de Roys & de Princes sinon pour les conduire au moins pour les manger; Et ils ne se donnent point de peine qui que ce soit pourueu qu'ils vivent heureusement. Marque ceste chasse qui a interest à l'escot.

Nous auons aussi à vous dire que passant chemin nous vismes faire vne plaisante Reueuë sans toucher argent. Le Capitaine qui marchoit à la teste de la troupe tenoit dans la main quelques vieilles Pancartes couuertes de toilles d'araignees, auoit vne Nef de papier sur la teste sans voile & sans Timon & sur vn escreteau la figure d'vne lanterne toute rompuë avec des parolles Barbares qui signifioient. *Je vous feray riche*. Ils marchoit à la desbādade ayans presque tous des Tableaux dans leurs mains. Il y en auoit plusieurs avec Chapperons verds & aureilles de lieures & des marotes, leur deuise en Barrogoin, *Plus ou Rien*. D'autres auoient des coins & des marteaux

& ceste deuise, *Tout de bon aloy*. Plusieurs autres estoient là portans vn papier rouge & ceste deuise en champ verd; Il sera brulé, Toutes ces gens de différente humeur & condition estoient là pêle-mêle confusément comme des estourdis que ie laisse à vous représenter pour cause de briefueté, & pour venir aux articles que nous desirons vous proposer pour le bien de l'Estat,

ARTICLES.

Nous supplions à genous le Roy Tres-Chrestien, le plus grand del'Vniuers, avec toute reuerence & humilité d'accorder les Articles suiuaus (sauf meilleur aduis.)

PREMIEREMENT.

Que sa Maiesté iurera solennellement de tascher, avec l'ayde de Dieu, d'oster les schismes de la Chrestienté, et particulièrement de son Royaume pour la Religion, estât venu en aage competant: Et que sadicte Maiesté fera durant ceste assemblee des Estats vne Declaratiō de cest article & autres qui seront approuuez, enregistrez à la Cour de Parlement et publiez par tout le Royaume.

II.

Que les Blasphemes seront punis.

III.

Les Simonies ostées.

IV.

La Paulette et toute venalité d'office de indicature, de finances dans le Royaume & de toutes sortes de charges dans la maison du Roy, &c.

V.

Quel a pragmatique Sanction sera restablie.

VI.

Que l'alliance du Grand Seigneur sera rompue, et n'y aura plus d'Ambassadeur à sa porte.

VII.

Que la noblesse sera remise en sa première splendeur et administrera la Justice comme anciennement: neantmoins que la porte sera tousiours ouverte à la vertu pour les charges de quelque condition qu'on soit.

VIII.

Que le commerce sera estably, et les galeres remises comme du temps du Roy Fr. I. et H. 2. pour y enuoyer, si le cas y eschet, tant de factieux qui fourmillent en France.

IX.

Que nul ne pourra estre Abbé ny Curé qui ne soit Theologien, et si plusieurs s'en trouuent aux aboies et à l'Espagnolle, s'en curera les dents à ieun à leur dam.

X.

Que la recherche soit faite des concussions & larcins des gens de Justice, & sans faire tort a personne, on en retirera des sommes excessiues pour le throsor du Roy.

XI.

Que les Commissions emanees du Conseil du Roy n'ayent besoin d'estre confirmees par les Cours de Parlemēt si ce n'est celle des Pairs pour certains cas. Si iustes, elles doivent estre receuës: sinon on les faict tousiours passer aux autres Parlemens par faueur ou par argent. Argent fait tout, cela est trop cognen. XII.

Que le grand Conseil soit osté, non seulement comme inutile: mais comme vne eschole de chicane, où ils se hastent tant à la fin du Semestre (pour ne laisser rien à leurs successeurs d'aussi bō appetit qu'eux) qu'ils ont iugé quelque fois des procez a trois deX. XIII.

Que les Baillifs & Seneschaux exerceront leurs charges come anciennement, avec le mesme pouuoir & authorité, sans

Lieutenans, estans presens, et ne pourront en auoir que de robe courte, en leur absence, non autrement, & que les Lieutenans qui sont à present seront supprimez par mort.

XVI.

Qu'à l'aduenir il n'y ait plus de Connestable ny de Colonel del'infanterie. Ces charges sont inutiles, et leur authorité dangereuse, principalement à la minorité des Roys: & qu'on en face vne Loy Salique, bien salée, qui ne se corrompent iamais.

XV.

Que nul subiect du Roy quel qu'il soit, ne pourra faire battre monnoye, & qu'il ne s'en mettra que de la marque du Roy.

XVI.

Qu'on trauaillera pour les monnoyes sur le fin, sans iamais en affoiblir le pié, et la saque d'icelles desendue sur peine de la vie.

XVII.

Que tous Iuifs seront bannis du Royaume, ou qu'on ne chantera plus de Messe.

XVIII.

Qu'à l'aduenir on ne se seruira point d'estrangers pour la guerre, bien leur payera on pension pour entretenir l'alliance. Un Suisse despend plus que six François. La premiere chose qu'il liure, c'est de n'aller point aux assauts & la veille ou sur le point d'une bataille de tourner ses armes contre nous s'il ne touche argent. Honte & reproche à la France qui à tant d'hommes, de ne scauoir se passer de ses voisins.

XIX.

Que deffences soient faictes à peine de la vie, à tant de faineans d'aller en pelerinage hors du Royaume, qui emportent en Espagne & Italie plus d'un million d'or tous les ans. Requeste presentee par S. Denis & ses compagnons Martyrs, S. Michel, Sainte Genecieve et autres, qui valent pour le moins autant que les Saints estrangers. Justice leur soit faicte sans attendre le mandat de Rome, et pour cause.

Que deffences soient faictes à tous Predicateurs d'es-
monuoir le peuple à sedition, a peine d'y laisser le moule
du bonnet.

XXI.

Que les Officiers dans la maison du Roy soient Gentils
hōmes cōme anciēnement, mesmes du temps de S. Louys,
suyuant le mesme ordre.

XXII.

Que les Compagnees des Gendarmes & cheuaux legers
seront fournies de Gentils hommes ou autres de famille
honorable ayans de la vertu.

XXIII.

Que tous Gouverneurs, Maistres de Camp, Capitai-
nes et Commissaires des guerres seront cassez. qui en fa-
çon quelcōque mettront les gens de guerre en la bourse,
ou le permettront.

XXIIII.

Que la chicane sera exterminée: mais attendant son en-
tiere destruction au salut de tant d'ames endiablees qui
en viuent, on rongnera les robes et soutanes des Chica-
neurs, parce qu'il n'y a que trop d'estoffe sur ces sots anes,
principalement quand il fait crotté.

XXV.

Que les Duels seront arrachez à iamais, & pour cest
effect le Roy iurera de nouveau à son bon iour publique-
ment et solennellement, que le premier qui luy demande-
ra grace sera lapidé.

XXVI.

Que tant de gens de neant faictz Gentils hommes de la
chambre pour cent francs, ou par le Roy deffunct durant
la fureur des troubles: Autres Gentils hommes seruans
ou Escuyers pour trente francs en Guyenne & ailleurs,
sans leurs recours à qui bon leur semblera, sans despens.

XXVII.

Que ceux qui ne sōt de bōne & anciēne maisō ne pourrōt

Faire appeller leurs femmes Dames, sur peine de punition corporelle: Mais pour pauvres qu'ils soient, permis, à ceux qui seront de la susdite qualité. A eux conseil donné de ne faire pas ventre de bureau & robe de velours. Ainsi tant de petites Dames du Triq traq, des guerres civiles seront desdamees, voire deschaperonnees, s'il semble bon aux Estats. XXVIII.

Que ces tiltres de hault et puissant seigneur, de Messire & de Cheualier, ne pourront estre mis aux contrails que par Comtes, Barons, en fin haut Iusticiers de la vieille impressiõ, & non de celle de Champignons d'une nuit à peine de confiscation de leurs fiefs, ou de grosses amandes ameres. XXIX.

Que les Financiers, gens d'Eglise et de Chicane contribuerõt tous pour acheuer le dessein du bastiment du Louure, afin d'empescher que les estrangers ne facèt la mouë en voyans une si laide entree.

XXX.

Que les Princes & riches Seigneurs n'aurent nulles pension, horsmis les Officiers de la Couronne & Gouverneurs des Proninces pour tenir table seulement, non pour entretenir des pensionnaires, & se faire des Creatures aux despens du Roy: aux leurs tant qu'il leur plaira, qu'ils se defendent du prix. XXXI.

Que dās les Compagnees des Gendarmes, Cheuaux legers, Compagnees entretenues aux Regimens & frontieres, ne pourra entrer personne qu'avec cognoissance expresse et permission du Roy, sur peine, que les chefs seront demis de leurs charges. XXXII.

Que nul valet ne pourra quitter son maistre sans billet, à peine des gales.

XXXIII.

Que les charges de Gouverneurs des Proninces, des villes Grāds Maistres, Chābellans, Capitaines des Gardes

et autres dans la maison du Roy & ailleurs, ne seront point hereditaires. XXXIIII.

Que le Roy prestera solennellement de maintenir tous ses subiects en bonne paix, tant d'une que d'autre Religion. XXXV.

Que les Peres Iesuites ne hanteront point la Cour suivant leur institution fondamentale, & ne se mesleront de l'Estat qu'à la façon des bons Peres Capucins, sur peine de bannissement perpetuel, & n'iront plus en Carosse.

XXXVI.

Que Monseigneur le Prince et les Princes & Seigneurs ses Conuenans, quitteront leurs pensions au Roy pour quatre ans, & ce sera pour recôpenser ceux qui ont bien seruy leurs Majestez en ces occasions passees. Plus donneront le tiers de leur reuenu pour autres quatre ans, dont sera faict un fonds pour estre distribué par des gës de bien dans les Prouinces ruinees, comme de raison.

XXXVII.

Que les tailles seront portees par les Consuls & Eueux aux despens des Communantez dans l'Espargne, qu'elles seront imposees & leuees equitablement, à peine de la vie.

XXXVIII.

Que ceste confuse quantité d'Officiers des Finances & autres sera ostee par supression ou autrement, comme il sera requis.

XXXIX.

Que ceste multitude innombrable de Sauterelles chicanieuses qui broutent tout, verd & sec, et, en termes indefinis, sont en nombre de plus de trois millions, soit abolie, ensemble six vingts mille Sergens qui sont dans le Royaume: qu'estans conuaincus de concussions & malversations, ils seront enuoyez incontinent & sans delay aux Galeres, et que le general n'espargnera point leur peau.

XL.

Que nul que les Princes n'irera en Carosse ny à cheual dans le Louure.

le Louvre. Permis aux gouteux, sciaticques & autres mal-
leficieuz de se faire porter en chaire s'ils le trouuēt bõ, par
des Suisses ou autres n'importe.

XLI.

Que celuy qui entreprendra iniustement, quel qu'il
soit, contre un officier domestique & commensal de la
maison du Roy faisant sa charge sera demis de la sienne
sans remission & sans exception.

XLII.

Que tout officier de la maison du Roy qui vsera d'in-
solence sera chassé & puny exemplairement.

XLIII.

Que nul puisse auoir 2. grandes charges, ny deux gou-
uernemens d'importance, ou qu'il se forge deux testes &
4. mains.

XLIII.

Qu'il n'y aura plus d'Ambassadeurs ordinaires vers
les estrangers, & n'y seront enuoyez qu'aux occasions,
n'y d'eux à nous.

XLV.

Que M. le President Iannin demeurera en sa charge
tant qu'il luy plaira, à peine que tout ira en confusion, &
que le feu S. Antoine eschaufe quiconque luy voudra
faire quitter.

XLVI.

Que les gouverneurs des Provinces & des villes chan-
geront de trois en trois ans, afin que chacun se rende ca-
pable & vertueux, & se ressente de la beneficence du Prin-
ce.

XLVII.

Que les maisons nobles achetees par des roturiers puis-
sent estre rachetees et retirees par les plus proches parens
en defaut de ce par le Roy en remboursant comme de rai-
son.

XLVIII.

Que nul ne pourra tenir carosse horsmis les Euesques, s'il
n'a vingt mille liures de rente ou s'il n'est de grande mai-
son bien qu'il en ait moins, ou ayant charge publique.

XLIX.

Que les viures estant à bõ marché tout le reste le soit aussi

puis que les Marchands et les Artisans disent toujours les viures sont si chers, pour faire valoir leur chalandise.

L.

Que nul à l'aduenir ne pourra estre chancelier de Frāce s'il n'est gentilhomme portant espee comme anciennemēt capable & lettré, ou de fort honorable famille et de grāde & singuliere vertu et capacite. LI.

Que nul Prince ne pourra estre assis ny marcher au rang des Princes du Sang, on qu'il n'y aura plus de loy Salique.

LII.

Que tāt de Thresoriers generaux et Maistres des requestes seront supprimez par mort & leurs femmes desdamees, n'y aura qu'un Thresorier general en chaque Province qui sera gentil-hōme comme anciennement et quatre maistres des requestes pour tout.

LIII.

Qu'il n'y aura plus que deux Aduocats au Priuē Conseil dōt en fait vne autre Cohue du Chastelet. LIIII.

Que ces dignitez de Conseiller d'Estat ne se donnerōt plus qu'aux gentilshommes de bonne et ancienne maison capables et vertueux: Neantmoins que les autres gētilshōmes ceux du Tiers Estat y pourrōt paruenir quād ils excelleront en vertu & capacite.

LV.

Que le Roy iurera deuāt Dieu en faisāt sō bō iour haut & clair en presence de tous, de recercher & punir les auteurs du parricide execrable de H. le G. quels qu'ils soient pour expier ce sang espandu si barbarement, afin d'oster en partie l'opprobre de la France et reparer la hōre qui nous est faite par toutes les nations de la Terre de si grand'abomination.

LVI.

Que loy soit faite stable à iamais inree avec grands sermens de ne faire aucun Edict qui ne soit iuste & cōme tel exactement obseruē. L'observation des Edicts ne dure pas 3. iours: Incroyable ruine à l'Estat & sujet de mespris aux estrangers.

Voila, Messieurs des Estats, que nous auons résolu de vous proposer tousiours (sauf meilleur aduis & le droit gardé à vn chacun, le tout sans dessein, sans animosité :) Dites le vray, Certes nous vous auons bien taillé de la besogne & ne scauons si vous pourrez auancer à la coudre route, eussiez vous autant d'aiguilles acérées qu'ils y en aches les Peletiers de Paris. l'auois oublié vn article. *Que nul Almanach ne soit dedié au Roy.* Il y en a qui en riront, à eux permis. Et nous disons qu'il n'entendent pas bien les Tropiques ny les Tropiques. Que le Cancer mange & le Carpricorne puisse coiffer les Testes retrogrades qui n'entendent point le mouuement irregulier des affaires. N'est-ce pas vn scandale qu'on dedie des superstitions & des choses défendues par la Loy de Dieu à celuy qui doit faire punir les Deuins & toutes ces especes de forciers de mauuais regard ? Il y en a bien d'autres, direz vous, plus hupez ou plus Duppez qui triomphent. Tant pis. Nous sommes de pauvres rustiques qui n'entendons ny A ny Boy & parlons selon vn sens naturel & quelque experience des choses du Monde.

Vous nous direz donc, Messieurs, que nous vous auons mis en grand accessoire, & que c'est l'Estable d'Augias (comme disent les Clercs) & que vous n'estes pas des Hercules Gaulois. Il y a bien de l'ordure Vrayement ce mon: Mais ce ne sommes pas nous qui l'auons faicte. Il y a parmy vous tant de Docteurs, d'historiens, de Legistes. Voyez comment les Perses, les Medes: les Grecs & les Romains, mais sur tout les François se sont gouuernez en la corruption des Estats. Et ie croy que sans aller plus loing vous trouuerez dans les Ordonnances de nos grands Rois tout ce qu'il faut pour rendre vne Monarchie aussi

parfaitement heureuse que la condition de la foiblesse humaine le peut porter. l'ay ouy dire à des Clercs. Examinez tout, Accordez bien vos chalumeaux & vous orrez des bons accords. Pourquoy tant d'honneur, de prerogatiues, de priuileges, d'abondance & ne vouloir point feuiller les Annales, les Pancartes & les Chartres pour le bien public; Piez plats, direz vous, silence, vous nous rabustez les cerueaux. Nous sçauons tout le Grimoire, il n'y a rien plus à fureter, la France est plaine de belles loix. C'est d'elle que nos voisins les ont empruntees, mais il luy est arriué comme aux Cordonniers qui chaussent bien les autres & ne sont iamais bien chaussez. Par S. Iean vous nous rendez quinaus, Messieurs des Estats, Il n'y a pas vne lettre perduë. Ho! ho! voila donc la responce cathégorique.

Nous vous supplions qu'il nous soit permis d'eschplucher ce Negoce & peser sagement d'où vient vne si lourde faute & si dommageable. On est puny pour dire le vray, si le faut il dire. Ce malheur vient des Rois & de leur Conseil. Quad vn homme est yure il se precipite à tout peril. Ce ne sont pas les iambes, les bras, foye ny la rate qui en sont cause. Et qui donc à vostre aduis? C'est la teste. Les yeux guident & les pieds portent. Ce sont offices reciproques. A qui tient il que les loix ne soient obseruees? Aux Magistrats. Le premier Iuge & Magistrat du Royaume c'est le Roy. Il faict les loix, les defait, les corrige, les modifie, tout avec Iustice autrement il n'est plus Roy. Il est donc l'Ame des Loix, non seul, mais son Conseil dependant de sa Majesté, Conseil suivant lequel il se gouuerne. Il arriue que le Prince est de mauuais naturel ou a de mauuais Conseillers, par consequent les peuples sont oprimeez & tout va en

confusion. La faute, a ce compte, n'est pas d'un seul. mais de plusieurs. Quand le Prince souverain est mal disposé de son entendement où en bas aage il faut auoir recours à son Conseil. S'il y a du mal c'est à luy qu'il s'en faut prendre, & a qui donc au Marguillier de S. Merry? En ce basaage de nostre tres grand LOUIS 13. nous auons son Conseil. Suiuant les plus belles cōstitutions de l'Estat la Royne sa mere en est le chef. Monseigneur le Prince, les autres Princes, Officiers de la Couronne, principalement Monsieur le Chancelier & plusieurs Grāds & notables persōnages de l'Estat font tout le corps, c'est donc à ce Conseil qu'il se faut prendre en ce temps si les bonnes loix ne sont pas obseruees; car il ne tient pas à nous que nos vaches ne nous soient rendues, & ie m'en rapporte aux preneurs.

On nous dira que dans ce corps du Conseil qui doit estre le Baze de l'Estat, il y a bien des parties viciuees d'ambition, d'auarice, d'enuie & de toutes sortes de malice. Nous le cognoissons tous, & les estrangers s'en moquent. Qoy pour cela, Messieurs des Estats? N'estes vous pas assemblez pour cest effect: Estes vous venus icy pour apprendre a danser ou a iouer du flageolet: N'estes vous pas choisis expres pour parler librement & iustement pour le bien commun, Vous despēdez tous les iours six mille escus, & vous ne direz pas franchement vos aduis: Serez vous des vaches ou des bufles insensibles à nos maux insupportables? Le Roy selon la cognoissance que Dieu luy a donnee en ce basaage qui surpassel'ordre commun de la Nature [aussi est il, bien qu'hōme, par dessus les hommes] desire que son Royaume soit réglé sainctement & iustement, La Reyne sa mere qui ayme plus l'Estat qu'elle mes-

me, & nostre felicité que la sienne propre, bõne s'il y en eut iamais entre les Reynes n'a point de plus haute ambition. Elle veut rendre compte aux Estats de sa Regence, a quoy elle n'est obligée ny par les loix diuines ny par les humaines. Si vit il iamais rien de pareil? A qui tiédra il donc qu'un bon ordre estably en ceste Monarchie ne soit obserué?

Nous sçauons bien que le Roy ne tient que de Dieu & de son espee, que sa puissance est absolue & souueraine. Ainsi nous parlons avec toute humilité & reuerence tenant les Estats, mais c'est en cela que nos Roys ont surpassé tous les autres. Car par vne assemblée legitime ils se sont tousiours communi-quez a leurs peuples comme peres, non comme seigneurs seulement, pour ouyr les plaintes: c'est la plus excellente harmonie des Estats & formes de gouuernement qui soient au Monde, & la plus admirable ou l'Empire & la Clemence, la force, & la Bonté sont iointes de façon que lors que le Prince souuerain n'aime plus ses subiects cõme les enfans, il desiste d'estre Roy. Voila donc les subiects qui representent les maux à sa Majesté, tout cela ne gist qu'en aduis, remonstrances, supplications. Apres le Roy fait ce que bon luy semble par l'aduis de son Conseil. C'en est donc pas vne bride à la puissance souueraine, il est vray Messieurs des Estats: Mais ie vous diray, le secret. Lors qu'on presente à nos Roys les Necessitez de l'estat, comme vrayement Roys & non Tyrans, ils ont compassion de leurs subiects & mettēt ordre aux affaires. Et si vous employez le temps à songer a vostre particulier & à vous piquer les vns contre les autres, quel moyen d'en decouurir les maux & d'en rechercher les remedes? Ainsi tout demeurera en confusion & l'Estat

tombera en ruine.

Nous sommes pauvres idiots & ne remarquons (selon nostre foiblesse) que les choses grossieres. Nous vismes faire vne cure en passant, d'un miserable qui languissoit pour ne vouloir permettre qu'on luy coupast certaine partie de son corps. Les Maistres experts luy disoient que la Cangrene s'y aloit mettre & qu'il estoit perdu. En fin il souffrit qu'on la luy coupast apres auoir eu beaucoup de mal, & sauua tout le reste. Qu'on oste donc ces parties vlcerees qui ne font qu'infecter ce grand corps si on le veut remettre en sa premiere vigueur & santé. La difference de ces deux corps sera notable: Car à ce patient le corps luy demeurera mutilé, & cestuy cy au contraire en sera plus entier. A l'autre on ostoit vne partie necessaire nee & nourrie avec luy naturellement, A cestuy cy on arrache des excremens engendrez par les excez & debauches des desordres & des guerres ciuiles: Corruptions de la malice des hommes, puanteurs des derniers siecles du Monde.

Vous estes comme Ephores pour corriger nos maux qui ne sont pas irremediabiles si vous auez iugement & courage de bien faire: Mais vous n'y allez que d'une fesse, perdez le temps en ancre & en papier, en discours inutiles, en vanité de pressence complimens & autres bagatelles, qui n'aggreent pas à ceux qui vous deffrayent. Quand on parle à aucuns de vos despences ils disent souffriant & dōnant du nais à qui en a assez. que l'argent demeure dans le Royaume, ô la triste consolation! mais la grāde desolation! Celuy des Concussions, des faussetez, des larcins des finances & de la chicane y demeure bien, & pour cela vos conclusions sont elles iustes? Le mauuais argument de Sophistes pour les bourses des

communautez. On nous dit encore pour nous re-
jouyr, qu'au lieu d'exterminer à iamais ceste maudi-
te Paulete qui rend le larcin hereditaire on le veut
continuer & qu'on vëd toutes les charges & offices
à la maison de Monsieur. Il y en a bien là pour nous
faire deuenir fols par Bmol & par Bquarre & nous
le sommes assez par nature. C'est à vous Messieurs
des Estats ou les Estats, comme il vous plaira, car ie
suis vn pauvre rustique qui n'entend ia gramma-
rique, c'est à vous Messieurs d'y mettre ordre puis
qu'il plaist à leurs Majestez.

Nous craignons que nos Cayers comme nostre
argent s'en iront en fumee de cuyfine ou autrement
les trois estats en ce Royaume sont comme le cer-
neau le cœur & le foye, toustrois vnis estroitement.
Liaison incomparable, mariage admirable de la Na-
ture qui bute à leur conseruation. Les Nerfs, les ar-
teres, les veines ont certaine tiffure & correspondā-
ce & contribuent tous en general & en particulier
au bien commun. De leur diuision s'ensuit neces-
sairement la ruine de tout le corps. L'Analogie qui
est entre ces trois principales parties du corps hu-
main & les trois Estats du Royaume est assez co-
gneuë. Le Clergé guide comme le Nort de la Pieté.
La Noblesse soustient par son courage. Le Tiers E-
stat comme le Foye, ainsi qu'il a esté dit au commen-
cement, distribué le sang par ses veines à ces deux
excellentes parties & les nourrit. Il est de ces trois
comme d'un nombre: vous n'y sçauriez adiouster ou
diminuer sans destruire sa Nature. Nous sommes
des pauvres rustiques qui n'entendōs rien à ergoter:
Mais nous tirons bien de là vn argument que s'il n'y
a vne bonne harnnonie entre ses parties il ne faut at-
tendre que la ruine de tout le corps. Or chacun de
ces

ces trois à son office particulier, par lequel ils sont distinguez. Voyez les cinq doigts de la main ils sont separez, & chacun a vn mouuement incommunicable aux autres, & toutesfois ils sont ioints ensemble pour tout le reste. Souuenez vous de la fable qu'allegua ce grand Sénateur Agripa durant la diuision de la Noblesse & du peuple.

Nous sommes aduertis qu'il y a vne mauuaise correspondance entre la Noblesse & le tiers Estat. Ces iours passez on a dit certaines paroles, où il n'y auoit pas beaucoup de faueur pour aucuns: toutefois dictes simplement, interpretées cruëment & sinistremēt. Mauuais discours là dessus & menaces avec mespris, qui tesmoignent que tout l'argēt vif n'est pas dās les minieres. Pardonnez s'il vous plaist à ceste liberté, il nous sera permis de parler pour nostre argent fixe. En terme generaux il ne se peut mieux dire, *Que c'est vne hôte qu'il faille que le Roy achete la fidelité de ses sujets à prix d'argent.* C'est la These generale qui est tres-veritable. La raison, par ce que nous deuons tout au Roy par les loix diuines & humaines. De plus, la vertu n'est point mercenaire, elle est son loyer elle mesme en ses belles & glorieuses actions. Demeurant donc dans ces termes personne de sain iugement ne s'en doit offenser. S'en scandaliser est outrager la vertu. Il ne s'ensuit pas neantmoins que le Roy ne puisse & ne la doieue recognoistre. Cela s'est pratiqué de tout tēps, sans sortir de chez nous, d'où viennent tant d'ordres, de priuileges, de prerogatiues, de grands & aduantageux tiltres de nostre Noblesse que la sagesse des Roys qui ont voulu honorer les vertueux? Tout cela est bien de plus haut relief que de donner pensions. Il y a donc en ceste These generale, comme parlent les Clercs, vne explicatiō essen-

tielle. *Que c'est vne honte qu'il faille que le Roy donne des pensions à des gens de neant, qui n'ont jamais seruy, inutiles, vicieux, factieux, & plustost dignes de supplice que de gratification.* Voyons le reuers de la Medaille. Où l'on pourroit estre mieux employees les pensions que pour ceux qui n'ont point de plus haut desir, apres la gloire de Dieu, que de seruir le Roy, que de mettre leurs biens & leurs vies pour sa Maiesté & par conséquent pour l'Estat: Et il s'en trouuera parmy nostre Noblesse vn bon nombre de ceste marque. N'est-ce pas aussi la plus volontaire & la plus genereuse du monde? Plust à Dieu qu'elle fust plus sage. C'est vne niche, où les compatriottes & les estrangers ont placé vne statuë de Temerité, pour accuser la faulxe imagination qui la transporte & la rend miserable par les querelles.

Pour retourner à nostre These voyla donc le vray sens de ces parolles: car autrement ce seroit parler avec trop d'impertinence. Disons que cela touche plus au Tiers Estat qu'à la Noblesse, par ce qu'il a plus de pensions qu'elle. Il y a tant de Nobles qui ne font pas à la Rose, nouuellement imprimez que c'est pitié. Ainsi ne faut pas se pointer là dessus, & forger des interpretations chimeriques, Le cœur est le premier viuant & le dernier mourant. *Que feroit le Foye sans luy?* Mais disons aussi que sans les esprits naturels, les vitaux ne pourroient subsister. Il est indubitable que la Noblesse est le cœur de cest Estat, aussi a elle tant de grands priuileges sur le commun: Mais voicy vne subarbade à l'insolence: ce n'est pas pour elle seule, c'est pour le bien public.

Il y a vn autre point dont on s'est picqué contre le tiers Estat: *Que la Noblesse se rende capable d'exercer les charges de la Justice.* Exemples, alleguez là dessus de

Charlemagne, & autres Empereurs & Roys de France. En general cela se peut dire pour l'aduenir. Interpretions sans passion : il ne s'ensuit pas qu'il n'y ait quantité de gentils-hommes au Royaume capables de ces charges en toutes les façons qu'on les sçauroit prendre. Nos Seneschaux anciennement iugeoient & n'auoient point de Lieutenans, si ce n'est en leur absence, & la Iustice estoit entre les mains de la Noblesse, Loy expresse qu'on voit encore au Thresor. *Que nul de robe longue ne puisse exercer la Iustice & estre Iuge.* Le Latin de ce tēps-là, dit Frere Guillaume, n'estoit pas si friand que celui du nostre, mais ceux qui le parloient estoient plus gens de bien, ils n'auoient pas la Rhetorique si mignarde & si atifée, ouy bien la conscience meilleure. Je dis pour plusieurs. Tirons vne consequence necessaire de cela, que ceste grande & si vtile action ne consiste pas tant à sçauoir beaucoup de Latin, que d'auoir ceste precieuse piece de la bonne conscience, si rare en ce temps, avec vn bon sens, & sçauoir les principales loix & les coutumes du pays. D'ailleurs si on regarde parmy ceux qui administrent la Iustice, on y trouuera des trois parts les deux qui ne sçauent pour tout que la Loy. *Qui potest capere capiat.* Ainsi donc Messieurs des Estats, en ces deux propositions, selon nostre pauvre iugement, il n'y a rien de quoy la Noblesse se doie offencer. Et certes c'est trop debile de parler d'esperons, de laquais, &c. Le mespris est vn foible instrument pour vne bonne intelligēce, sans laquelle il n'y sçauroit auoir vne estroicte vnion, qui doit estre la premiere rouë de ceste grāde Machine. Ce n'est pas le moyen de remedier aux maux de l'Estat que de se diuiser. Quand quelqu'un a nial à vn bras, auquel il a fait mettre vn appareil, si l'autre l'arrache il n'y a pas

moyen de guerir, mais vostre aduis si luy mesme ne s'en ressentira pas avec tout le corps? Voulez vous que ie vous parle à la franche Marguerite, Messieurs de la Noblesse vous estes dignes de reproche, & on vous a donné là vne stillade à propos. Il est vray qu'il y a plusieurs Seigneurs & Gentils-hommes doctes, voire tres-doctes, de bon sens, capables de toutes grandes administrations, mais c'est le petit nombre, & il y en a tant d'autres esloignez de ce port. Quand on oit ordinairement vomir des parolles sales & puantes, blasphemer le nom de Dieu detestablement, qu'on voit passer les nuits à berlander, & le iour à faire retentir Tran, Tran, se precipiter au peril & se couper la gorge pour vne vieille lanterne, somme embrasser mil autres actions, ou indignes, ou inutiles avec transport: quel nom voulez vous qu'on vous donne à telles gens? Il me semble que celuy de Iuges & de Magistrats qui est si graue & sacré, ne seroit pas bien à son iour de ce costé là. A ce cōpte le mespris naist de vos deportemens. En passant, c'est vne petite remonstrance tacitement, & aduertissement au Lecteur de faire mieux à l'aduenir. Ce pendant le tiers Estat accorde librement que les offices de Iudicature ne soient plus venaux. Desire que la Noblesse suyuant son ancienne possession exerce la Iustice, & de bon cœur luy donnera l'aduantage. Mais elle doit aussi trouuer bon que la carriere de l'honneur & des charges en la Iustice soit libre & ouuerte à la Vertu, à l'experience, à la capacité: ô glorieux combat, si vo' autres faisiez à qui mieux mieux, ô la belle emulation! Louïable contraste où chacun tasche de s'aduantager sur autrui, comme quoy? par force, par Tyrannie: Non, mais par pieté, par Iustice, par prudence, & en fin par toutes sortes de vertus. Aux au-

tres combats c'est honte d'estre vaincu. En cestuy-
cy c'est vne grande gloire, en ceux là demeurer der-
riere est reproche, en cestuy cy aller apres l'imitation
des plus parfaicts, est tousiours louable, & de haut
prix. Les cadets de ceste sorte n'ont point honte d'e-
stre surpassez des ainez, & ce sont bien d'autres gens
que ceux dont se faschoit l'autre iour. Toutes les
Couronnes aux ieux Olimpiques n'estoient pas es-
gales, mais elles estoient toutes honorables.

L'autre iour sur la coste de ls mer en Poictou, ie vis
vn vieux bastiment, vne vieille Nauire, & vn vieux
arbre: Quantité de gens trauailloient à ces trois avec
tant de peine & d'industrie à couvrir, cloüer, ap-
puyer, qu'en fin ils renouellerent & affermerent
tout. A propos mon Pere grand disoit qu'il ne faloit
qu'une bonne racine pour empescher la cheute d'un
gros arbre: Il ne faut point que ie face de rapport de
ces trois pieces à ce qui est de l'Estat. Vous enten-
dez bien ces Analogies & propottions, nos miseres
sont assez cogneues & certes si sont bien leurs causes
principales? Les femmes & les petits enfans encha-
fourrent le parchemin. Portez vous donc vertueuse-
ment en ceste excellente œuvre tous d'un commun
accord, pour le bien de tous en general & de chacun
en particulier, & que craignez vous? Puis que leurs
Maiestez ne respirent que le bien de l'Estat, & leur
Conseil n'a point d'autre but, à quoy tiendra-il que
nous ne recuillons bien tost le fruit de nos esperan-
ces? Acquitez vous de vostre deuoir en equité de
conscience, autrement nous tiendrons nos Estats &
nos grands iours, & il y en a qui s'en repentiront. S'il
arriue que les Montagnes enfantent, comme nous
en auons quelque opinion, les rats ne feront plus
à barres dans vos greniers; car ils ne hantent point

les vuides, & croyez que les mesmes tempestes qui nous menacent vous accableront. Vous estes dans le mesme Nauire, de mesme maison, & branches de mesme arbre. Quand le gouuernail sera rompu, les fondemens sapés & les racines arrachees, iugez s'il y aura moyen de vous garentir du naufrage, des ruines & de la cheute effroyable. C'est à vous à y songer pour vous, pour nous, pour tous. On ne se trouue pas ainsi tous les ans sur le trottoir. Ne perdez point l'occasiō, Souuenez vous du peintre qui par hazard rencōtra ce qui estoit denié à son industrie & à l'art: Nous sommes à la veille de plus de maux que vous ne pensez. Souuenez vous aussi que les payfans ont vn grand aduātage sur vous, qu'ils beschent gaillardement à la vigne labourant la Terre, & que vous auriez aussi mauuaise grace à ce mestier qu'eux à dancer: Mais sur tout scachez qu'il y en a vn là haut à qui vous rendrez compte de nos larmes & de nos sueurs & que vous ne rirez pas tousiours.

E I N.

